

四庫全書

集部

欽定四庫全書

魚濟堂文集卷十七

大學士魏裔介撰

古樂府

短歌行

我有長劍掛壁不試我有旨酒盈樽不醉一解年華一

去不可再來讀書萬卷沸淖奇懷二解天下多故宜用

俊傑筐篚小智難與植業三解為爾寂寂鄧禹笑人顏

色憔悴自冬徂春

四解

折脅拉齒范睢則相褚冠疇伍

與人是謗

五解

周道如砥其直如矢百鍊之剛化為繞

指

六解

鴻雁啣蘆載翔載翔畏彼繒繳遠至瀟湘

七解

維水有潯維山有岑高卧雲霞慰此素心

八解

觀滄海

滄海非東崑崙非西倬彼天漢元氣混齊蓬萊三山是
邪非邪銀臺金闕侯不乘槎潤色萬物震動九土沐日
浴月天樞地戶幸甚至哉歌以詠志

龜雖壽

神龜雖壽塊然一物龍德變化超然羅爵委蛇委蛇與
時偕宜孔光則詐黃石可師達人之理彭殤一視隤然
任運哀彼代價幸甚至哉歌以詠志

薤露歌

大海湯湯鴻濛閉兮出日入月景不滅兮人命無常逝
相閱兮

蒿里曲

天地曠兮悠悠死不復生兮奚憂古今北卽兮高丘

子夜吳歌

悄悄與郎語聞郎大都去須待春泥乾為郎治行李

其二

燕京女兒多何如吳下好豈蔻花正開甘作閨中老

其三

鐵甕城邊路掛帆到揚州儂欲隨歡去不是覓封侯

其四

浪船利帆風況是搖輕櫓儂心已斷絕泣涕淚如雨

燕歌行效曹子桓送田髯淵

燕山吳水路修長離筵綠竹發清商古人遺事空斷腸
一語知心誰能忘黃鶴千里自翱翔不能奮飛白雲鄉
春寒陰雨忽高涼佳人欲為公子裳天涯回首一徬徨
今夕何夕幸同堂置酒臨風嗟未央長歌忽下衆星光
高車駟馬如履霜懷憂不覺鬢毛蒼良平事業漫相望
慙慙執手賦河梁

禽言

行不得哥哥霖雨三月平陸為河欲濟無梁茫茫白波
行不得哥哥

提壺蘆壺蘆提門前青草白雲來栖有酒有肉毋嗷嗷
而餉厥妻

瘦兒瘦兒南山種麻子東風夜雨麻子浥不見苗秧子
焉知母心悲悔後遲

不如歸去遠彼增繳喬林是處

今樂府

哀流民

田廬水沒無乾處流民紛紛向南去豈意南州不敢留
白晝閉戶夜蹲踞簷前不許稍踟躕恐有東人不我恕
上見滄浪之天下顧黃口小兒命也如何婦語絮絮逃
人逃人兮爾獨何為背爾主使我惟此荼毒我將爾詛
我欲爾詛其口維茲路有扶杜縊者誰子烏鳶嘒嘒既
啄而翫彼蒼者天良此黎庶

玉泉篇

玉泉之水橋下過既清且漣非洪波誰家孤子髮初紒
翩翩遊戲城之阿命如飛蛾投漩渦炎天白日怒蛟鼉
中流失壺空駭眈

其二

呂梁十丈奔如駛丈人常涉洄湍裏豎子之能不我知
魂逐涓涓玉河汜褰裳欲往不可止鬼母啾啾髮垂耳

其四

嗚呼人間風濤何其深洞庭既波灩澦侵長鯨礪齒若
霜鐔左徒空弔楚江潯彼君子兮大川舟楫濟一世而
為心

琴操

擬將歸操

河之水分波洋洋我不濟兮非無梁迴車東望涕沾裳
擬拘幽操

載瞻西郊兮同雲油油觀象布著兮天道可求率遵祖

德兮服事揚休讒人孔棘兮於君何尤終當有悟兮脫
我羈囚

擬雉朝飛操

有雉有雉南崗上日出杲杲羽初颺雄弔其雌羣雌和
鳴而飲啄相望我獨何為兮七十無家皤然成翁牧犢
中野誰與餉

擬別鶴操

黃鵠海上來翩翩比翼飛弋者誰氏子矰繳發其機雄

雌各驚顧悲鳴向落暉
構巢五年未生雛雲中相傍排
徊欲下將何歸

擬龜山操

望東魯兮龜山蔽之豈不懷歸畏羣婢之我疑山之陰
其雨瀰瀰父母之邦實勞我思龜山龜山吾將移爾填
滄海

四言

吏部徐元文別歸錢塘後因海寇阻隔歲暮抵燕

喜賦二章以贈

白雲鬱鬱栖我草堂彼其之子德音不忘握手言歸涉
其橫江

橫江既涉載旋其廬瓶有舊醕架有遺書山樗可采澤
魴可漁

五言絕句

猶龍與丈衣詩有夜雪打空廊君詩在何處之句

丈衣和之余步其韻

夜雪打空廊梅花窻外冷寒香初放時高韻何人領

其二

夜雪打空廊不知花落處只在風雪中風亦吹不去

其三

夜雪打空廊不聞夜雪響幽人正未眠澹然無所想

其四

夜雪打空廊迷却天邊樹孤舟一釣翁自識江干路

其五

夜雪打空廊濁醪味正濃夜深人靜後惟有一燈紅

其六

夜雪打空廊君詩在何處君詩猶如雪贈以雪中句

春日望西山

西望見雪山山雪同一色春來雪盡融山光淨如拭

山行

久負青山約今來雲上遊野花滿谷口流水出丹丘

高齋讀易

四聖紹心易秦人不敢焚若會先天意何須龍馬文

七言絕句

暑月露卧

曉夜炎風不肯停閒移繩榻趣孤螢袒胸跣足叢陰下
卧看長河沒曉星

涿州公廨古槐咏

古槐蒼鬱氣如虬飽歷風霜五百秋試看門前車馬道
紅塵滿目夕陽愁

東阿縣南渡河

長途驛路出東阿
草色蒙茸秋色多
馬上不知身在魯
臨流錯憶是滹沱

讀劉夢吉詩

鳳覽高風不可攀
黃金臺下水漫漫
古來誰是真同調
晉有淵明漢幼安

愜園十景詩

選五首

愜園在城南八里西汪村先子所築也十景皆

園中之勝

太行返照

山色東奔勢若流
深林返景一園收
桃源舊址猶堪賞
莫說仙踪古趙州

獄廟遠鐘

干戈擾擾隔東籬
人世興亡總不知
夜半鐘聲驚夢覺
此身不負白雲期

長橋攬翠

汲水編茅成小池，千株楊柳向人垂。
橋邊猶恐春陰薄，自插新畦三兩枝。

竹逕流水

琅玕數畝傍深潭，曲水流觴興正酣。
野客閒來復閒往，蓬居只在此村南。

荷池夜棹

一片紅香暮水灣，幽情更不到雲鬟。
孤舟自愛凌波去，寒露蒼蒼起白鵝。

南和秀才周茗柯來謁詩有踏雨搖青菓添燈留
故人之句余極為賞嘆

鉄骨氷心人已去梅花蕭索幾興悲周卽後起稱英妙
開卷先吟踏雨詩

遲友人不至

南望思鄉不可歸清宵有夢尚依依遙思昔日登高處
古樹寒烟鴈正飛

又

朝來飛雨灑層城便有幽思滿畫楹黃花裊露誰為侶
悵望白雲秋色平

和邑人耿爾瞻

未向南陽卧草廬疎慵空傍帝王居風塵自古多膠擾
悔不十年且讀書

其二

君去槐陰葺舊廬桑榆繚繞是幽居獨憐世事耽盃酒
看盡床頭烏篆書

其三

萬姓勞勞未得廬白雲深處可容居
耕田鑿井無多事閒課兒童小學書

其四

纔到春明便返廬閒雲野鶴不停居
他年若著逸民傳泔水西林藏異書

讀迷樓記

東去龍舟竟不歸烏銅屏裏醉春暉
可憐一炬成焦土

只有雷塘烏夜飛

題畫

青山一片紫霞堆
紅樹桃花相間開
應是天台迷去路
不教劉阮出雲來

和大司馬梁玉立趙郡風物雜咏

主父沙丘

騎射馳驅盡國中
秦廷私覲氣如虹
可憐探轂身無主
草掩沙丘古趙宮

顏常山祠

孤城血戰捍邊陲一死常留萬古祠
若解時平崇義士蜀川安得見旌旗

望諸君墓

齊城未破敢言歸代將人來事已非
惟有報書垂史策年年古木泣烏飛

藺相如

氣壓秦廷失媚諧迴車避頗晉崇階
當年刎頸因家國

不為交遊挹雅懷

漢光武廟

漢業重興自北來平原突兀見高臺不知鐘虞歸何處
空有石人伴草萊

信陵君祠

功高五霸破嬴秦故壘茫茫草色新湯沐至今名尚在
不知誰是抱關人

蕪婁亭

不忘河北事應論麥飯君臣契託恩寂寞荒亭餘破甑
行人指點舊孤村

趙陀先塚

龍川老吏霸羣蠻先塚蒙恩掩故山識命早除黃屋制
贈金獨重大夫還

送韓康海還內丘

又向蘆溝橋畔行瀟瀟時雨洒春城床頭周易還攜去
望斷蓬山舊友生

送吳秋林之江寧

時載母南返

八月秋風紅樹稠
扁舟一葉下揚州
情知不為封侯夢
載母聊為五岳遊

三河縣

彈丸黑子是三河
寥落人家傍水波
圈佔誰憐民力盡
城邊驛路重經過

薊門古漁陽

北門鎖鑰接遙岑
弔古空嗟草木深
一自

興朝定鼎後蕭蕭松檜滿山陰

鳳臺山

此地有龍洞谷

舊是長城烽火臺高峯削劣倚天開而今已見真人氣
雲物先從龍洞來

賜馬

權奇名騎錦雲韉從獵翩躚過古阡新出宛羣猶戀主
驕嘶不敢下金鞭

雨中東武進羊隨菴

時在長椿寺讀
王覺斯先生集

讀罷文安百卷詩忘言更欲去支離遙知鐘過白雲後
夢遶江南花雨垂

其二

連朝雨色潤芳疇盡洗炎飈翠欲流誰念招提羊處士
芭蕉聲裏一燈秋

龍槐讌集

好友何人足論心高槐陰綠夕陽深傳觴坐對西山色
雄辯由來慶盍簪

西子湖頭春色深

苧蘿誰解識西施一片湖光蕩漾奇
欲洗人間脂粉色
春風獨立聽鶯兒

夏日雨後讀書

掩關謝客誦奇書松色篁陰翠可茹
一室白雲自舒卷
何須山水問樵漁

贈如臯冒丹書字青若

佳士如今有幾人芙蓉江畔語偏新
夜談不覺茗頻咽

分得梅花一片春

題劉公駢手卷

不向人間食唾餘
空山讀盡五車書
百泉烟水依然在
何必終身卧草廬

世傳王昭君出塞馬上琵琶及青塚遺跡令人哀
之余讀史知其嫁呼韓邪單于後生男伊屠智
牙師為匈奴右日逐王則亦習而安其俗矣故
為絕句以嘲之非敢唐突西子也

漢宮一出號關支博得單于驚喜時生子為王名曰逐
相傳青塚也堪疑

雨後林間聞鶯

雨歇花香草倍青如簧巧囀入林垌此聲原不同絲竹
惟許幽人陌上聽

讀陸放翁詩

陸子放翁詩萬卷後來老練更疎狂須知深得莊騷意
莫與唐人較短長

元氏封龍山欲往不果

年來有興欲看山聞說封龍曲幾灣西蜀筇枝無覓處
碧雲空鎖水潺潺

讀黃庭經

汗牛充棟書何用一卷黃庭獨起余自笑老夫窮口腹

既餐熊掌復貪魚

官至宰輔復欲
學長生故云

上元夜訪真定張庚星父子

小門深巷靜無塵一室熙熙物外春杯酒不妨留閣老

堯夫當日是天民

哭大宗伯龔芝麓先生

海內文章誰與儔一朝零落向山丘故人下盡羊曇淚
宣武門前水自流

其二

每共華堂醉錦茵高談雄辯志芳隣三年蘭訊時相憶
寶冊今留紫鳳春

其三

扶持正論惟公許共濟時艱我願從生死交情真耐久
扁舟丹旆淚淙淙

其四

才華豈但如蘇李經濟應知似范韓竹屋短檠悲夜雪
素車白馬望江干

暮春咏齋中瓶花

戊午

每到春來自種花花開燦爛似雲霞世人誰解能相賞
獨與園丁嘖嘖誇

其二

中郎當日有瓶花却恨燕都風裏沙孰似吾齋晴日好
白雲深處艷奇葩

其三

花開花謝本無情日夕昏鴉噪古城試向來春南陌望
紛紅依舊遶枝生

偶得名手畫扇望其蒼黛之色隔絕人間如置身
雲山深處

層巒疊障隔長谿茅屋斜連春鳥啼幾欲卜居空悵望
白雲迷路草萋萋


有感

盜賊相連苦戰爭催糧加賦又徵兵誰知堅壁平吳楚
仍是當年細柳營

又咏楊花

戊午年有咏

裊裊空庭輕似雪依依小院薄如綿無人知是堤邊柳
占盡春光雨後天



魚濟堂文集卷十七

欽定四庫全書

集部

蕪濟堂文集卷十八

九

詳校官檢討_臣劉錫五

助教_臣常循覆勘

總校官進士_臣繆琪

校對官典簿_臣郭祚熾

謄錄監生_臣葉世華

欽定四庫全書

漁濟堂文集卷十八

大學士魏裔介撰

五言古

日暮自廣阿歸栢漏下一鼓

暮雲為赤鱗山色堆如髻野叟荷鋤歸坡田曠無際條
忽遠近昏樹杪窮鶴儷路迷仗矚馬膏火明塍暝皎月
漸吐由浮雲復脫翳晶晶天水光花霧同一氣荷衣霜

露重肅肅涼颼繼入門頓夷猶烹葵餐粗餲

朝起獨坐

病痊久閉門坐息得其處濛濛太古涵雲物自來去雙
樹植庭陰一鳥向人語我心澹無營冥然安所助

讀杜子美詩

古作多蔚跂茲編實云聖盥手展縹帙肅然起恭敬世
人誦公詩擷芳資游泳我誦見公心楷模性情正救琯
雖云非其意實孤勁一躋不復收驂騑終遠屏有語不

忘君愴怛忠愛盛飄泊蠶叢間櫛櫨長鑱柄路阻豺虎
多身傍干戈橫燦燦浣花詞磊磊夔州詠百年歌獨苦
斯語泪如迸放舟夷陵後潦倒春華競天困萬古胸抒
發鴻濛性陶冶不可窮世秉詞伯政讀之浹數旬高齋
風雨併既哭復還歌枕藉以為命斯人竟已矣怒焉心
如恫

讀李太白詩

三謝與鮑庾江左稱獨步太白更絕塵汗血如飛兔擲

筆振金石有文懸瀑布萬象羅胸中百代生指顧是氣
曰浩然不祇為章句沈香亭畔詞諷諫有微趣奴視高
將軍才人詎能慕羽翮落九天掛席逐烟霧留滯東魯
雲蹭蹬采石路我思汾陽王再衍晉陽祚云誰識此人
青蓮慧眼故無知功未酬夜即竟遠戍璘也實蠢愚偶
爾被龍笄龍章與鳳姿豈若爭食鶩古今稱謫仙斯言
良不誤黃金如可成須並子美鑄

夜醒

春夜宿齋中睡醒覺夜永呼童然膏炷四壁有餘炳長
安百萬家悄如太行嶺犬吠時復聞積雪起空冷耳目
俱寂然中懷獨耿耿乃知喧闐地未嘗無真境不必聞
晨鐘遽然有深省

夏日感懷

富貴多磨滅貧賤亦支離人生天地間倏忽如飈馳魯
陽不可倩誰能挽西曦惻惻烈士心常恐智慧衰榮名
古所尚修業當及時

二

登高望四野四野何蒼茫玄雲修翕翳炎蒸變清涼甘
澤沛九土百物以時昌大哉造化功孰可與衡量願以
頌君子為龍復為光

三

好鳥在樊籠不能翔與翔哲士沉下寮焉能遂賡颺仕
路多高足援手藉金張歲星照金馬執戟甘為郎叔夜
遇非時多才反致殃至人有愚色盛德貴深藏卓哉大

易訓知柔亦知剛

四

舉世尚浮華
冠蓋自赫奕
問以經濟方
相對如窮龜
咄咄久鬱陶
奮飛無長翮
海月如可拾
我欲掛片席

五

瞻彼庭中樹
煜煜有光華
秋霜未及濡
零落頓堪嗟
物華誠有時
吾生亦有涯
澡身嚴夙夜
比德耀晨葩
懔懔

君子願徒聞咏蒹葭

六

宴安廼耽毒聲色亦塵灰試聽遼東鶴累累一何哀拔
宅乘白雲一去不復回秦皇與漢武古云非仙才隨運
謀所適對月且啣盃

七

岵此不可陟舊廬且關心年未逾不惑白髮忽來侵蟪
蛄鳴高樹霞氣變遙岑感此懷怵惕中夜起長吟終當

脫丹黻挾冊赴長林

八

少者日以長長者日以老韶年高第人脩已為枯草世
謂運推遷非人所能造抑知物亂真自損致伐天欲以
駐顏顏安得安期棗寡欲而節食庶可延壽考

九

泝原有高士槐濱有達人東西雖一舍無異比屋鄰負
才各不羈素業自相親絕巘同攀眺孤潭共垂緝畢安

師尚長躬耕慕子真嗟哉出處異而我失其淳倦鳥思
故山有巢在荒榛時因晨風發良懷佳句新

十

宇宙日以新文章最汗漫諸子各簣鼓百家若河漢自
非卓犖識珠沙孰能判嗟余束髮時受業觀文彖四十
竟無聞坐惜年華邁嘗聞聖人言約禮斯弗畔庶用警
餘年勤補拙之半

五子咏

楊猶龍

揚子氣豁如愛賢如不及賦詩敵少陵感慨時欲泣嗟
峨萬仞崗振衣自獨立每見必怡顏清風穆可挹

魏環極

吾宗雪齋子屹然古人風苞苴不敢至門庭閒若空歲
食并州米疏震日華東鄭公猶可見翹首送歸鴻

曹厚菴

厚菴精名理著書繼濂洛體用既兼全聖道豈如爨訓

士良有方由博以返約一疏振紀綱千人自諾諾偉哉
文清儔大雅欣有託

申臯盟

風雅道寢衰百家矜藻絢孰識古人心清微自相禪平
干有奇姿氣高體亦變高齋數論文未覺隙光宴

郝雪海

郝生不羈士冰雪淨聰明方畧萬人敵抵掌死生輕志
大才頗疎飄泊中山城我欲往從之共作千日醒

元日懷猶龍楊太史

然燈照一室寥寥萬慮空
燕臺風物冷春至不聞鴻閉
門無酬酢憑几理絲桐
終始有天運大哉盤古翁
美人在何許琉璃蘭若東

和白樂天閒坐看書

朝罷即掩闕中庭啖秋果
蕭散百餘步復向齋中坐
久坐書讀炯炯見福禍
名以干進亡身因求利
墮何況戀妖姬自甘縛韁鑠
亦有耽麴藥翠羽包焦火
人生染

此毒動靜無一可所以學道人曠蕩觀真我

冬日送人之秦州

古人重友誼所信非徒然文章闕聲氣況乃出高賢君
今赴關隴綵筆攜雲烟嚴冬凜積雪班馬蝟如拳執手
一相送斗酒且俄延衆賓各有贈我意更纏綿天下方
多事撫綏宜為先努力要春華及茲智慧年倘有和杜
詩莫惜寄瑤篇

贈伯衡周掌科

孔雀奮赤霄寒泉逢觝觸古人有是言初聞猶恍惚懷
仁衆所尚斯意豈碌碌嗟余閱世煩撲檄同槁木八載
東華道風塵消髀肉歸來倚劒嘯白雲滿秋屋近交得
周子豁然怡心目抗議文石陞宗廟瑚璉肅慷慨念遺
黎慘淡歌采菑洪流方浩浩中原走蛇虺且共虎賁飲
莫向季子卜日暮悲風來為君一擊筑

彥遠胡子浙之高士也隱於河渚偶以求友至燕
余讀其感懷詩渾脫澹宕嘆賞不置然彥遠不

欲數數風塵中於其歸也作此贈之

東南有一士恥作老書蟬北至無終國西過首陽岑跼
足豈云勞曠覽一何深遺我一卷詩倍輦多遐音展讀
未及竟風雨掩孤顰昔聞無功子結廬汾之陰有友仲
長氏相對但成瘖君今栖河渚千載諒同心冥然觀元
化不敢問浮沉況我茅堂下名酒尚可斟忽復感時事
高懷失古今飛鴻啼錯落廣廈誰能任置之勿復道歸
卧聽春禽

送胡世其歸贊皇

子為大賢後郊外有名園
賜書蒲鄴架十載閉柴門
披褐來都下相見多嘉言
言亦何所道但云山中好
白雲
竊庭除花落常不掃
聞之怡余顏忽復傷懷抱
歲寒凋萬物今已生春草
五行暗鑠人盜之而使搞
若不豁雙瞳
金石焉能保子歸待竹林
明月紛浩浩余將拂衣去
抱甕以終老

甲午春流民南走如蟻有夫婦至漳沱河欲渡舟

子索值無以應遂並其子女赴河死余聞而哀
之作投河嘆

望望棄故里楚楚度層阿積雪愁未盡寒雨漫長坡豈
不念鄉閭命也嬰禍羅行期計匝月遙望見滹沱滹沱
何澎湃春風增白波對此心怵惕四顧空延俄饑夫前
致詞亦欲渡此河離鄉日已遠無食一身多况今襁褓
婦黃口一肩駝但獲渡濟去冥報豈有他舟子瞪目視
笑為船上歌饑夫語饑婦我當塋蛟鼉爾挾懷中雛丐

食行遠迨饑婦更無語長號赴奔渦饑夫投其雛捐命
同飛蛾是時天地黯慘色起嵯峨饑民岸林立咽泣空
跌蹉哀哉今之民而不如鴛鵝

趙友槐捐糧賑貧

古道日以淪越人視秦瘠際此兵燹餘原野一蕭索呱
呱誰家子捐棄在長陌王粲賦何悲鄭俠圖空嘖所思
在平原養士扶國厄趙君躡遺踪高風猶如昔指困活
萬家邑閭均膏霽緩急人之常誰能無屯阨何為素封

者撲滿不知割君看金谷園旋為狐兔宅積善惟天知
食報自無數

和龜山先生作

此日不再得莫問滄與桑忽忽度春華何以對彼蒼嗟
余近四十已非日出光為學有大原所貴復其陽此理
苟不昧旁燭神無方放之則六合卷之亦針芒富貴非
所欲能用則為臧貧賤豈可惡自屈即為戕朱門多肉
食白屋困糟糠立志宜卓然密之於退藏展卷思古人

字字遺澤芳寡欲而存心不息乃純剛譬彼南飛鴈秋
至莫傍徨衡陽與冀北天路豈云長吾道非他岐允執
是康莊奈何舍真意買續綴詞章鬻龍與繡虎馳聲翰
墨塲聲利如大國斧斤繼牛羊所學事云何移宅而妻
忘我誦龜山詩發憤願自強至寶非高深無勞梯與航
有求則得之優游守其常朗然方寸間終不可淪亡莫
待蹉跎後老大徒悲傷嘗聞聖人言克念即非狂

冬日示行志和尚

佛為清淨理禪乃解脫門無一法可說所貴悟其原聖
道惟至誠雍雍典禮尊洗心藏於密萬物豈能渾究亦
不剝落終古浩然存兼善與獨善大小各有源上人試
自証紛紛何足論

客有勸余出世者余作此答之

易簡是丹元大道為羣母立德而立言精神貴不朽濂
溪與明道千載有真壽何況孔顏者天地俱悠久陽德
方長時元吉在初九反復法天行兢兢夙夜守勿忘勿

助間不必金繫肘

銅雀妓

阿瞞負雄才生平實多慝
我我漳水濱華屋充羅穀
賣履與分香遙望西陵哭
何如燕昭王金臺為士築

其二

總帳圍雕欄美人顏如玉
諸侯多俘囚猶苦不知足
白日連陰風管絃尚調曲
不見漢天子一妻遭囚辱

讀滑稽傳二首

叔敖本賢臣忠廉無與比治楚楚以興闢地幾千里盡
瘁殞厥身咨嗟在將死託子於優孟羣臣良可恥譚笑
儼衣冠山居歌非俚寢丘四百戶十世奉其祀楚相不
足為婦言有妙理

羸季縱淫荒阿房窮塗赭赭衣遍道塗驪山工未寘元
元迫湯火鬼神亦瘁悸乃至欲漆城黝然光可被嘉哉
旃侏儒一言回狂恣蕩蕩雖非難蔭室未易植斯高據
要津而口竟為鼻哀哉古鄙夫胡不如優嬖

讀殷仲子詩 有引

殷淵字仲泓者廣平郡之鷄澤人少負奇志與
兄伯巖俱知名燕趙間常卧一小樓讀書數
年欲大有所建立會流寇破京師乃死於郡西
廣羊山年友揚太史以其遺詩示余余讀而哭
之嗚咽不能已乃為詩以誌且屬
太史為之傳太史仲泓筆硯友也

涼風颯然來晏坐北窻下展讀一卷書字字皆瀟洒忽
而毛髮豎歌哭不可假絕命於西山豈望人知者吾廬
距數舍聞聲相思也乃今得神交焚香奠杯筆赫號繞
怒虹滂沱淚盈把仲泓忽可叫奇雲突高厦至友有楊

子為文婉風雅作傳十年後墨胎祀同社嗟哉不義徒
富貴如飄瓦

出燕京右安門自祖氏園至萬泉寺廢城望草橋
浦見丘塚累累

城中屋炎炎城外塚件件炎炎土上人件件人在土百
年瞬息耳來去誰為主是人未土時有氣悍如虎百欲
養一身惟恐致咎寐胡為忽棄捐甘與枯草伍但見紙
錢飛白楊蔭石戶狐兔為其隣螻蟻為其蠹策馬過問

之有言終不吐去去勿復道登高望遙浦傳是耶律城
今惟餘殘堞陵闕盡灰墮瑣瑣安足數易水有新釀飲
之消愁苦及今不為樂去日安可補咫尺野雲來杏花
雜風雨

思鄉

連歲領烏臺憂傷頓欲老故人多隔絕不得相傾倒日
月如逝波但見原上草子女稍長成幸可慰懷抱有兄
在彭城有弟淮陽道霜月動鄉思月白紛浩浩

寄楊猶龍

時官晉泉司

昔在丙戌歲釋褐拜金闈共入木天署嘉言比弦韋討
論無虛日妙義燦珠璣黽勉歷寒暑索米忘其饑余時
官瑣闥君行入紫薇是時宵人聚天門高巍巍雲巾既
豕突豫章復合圍人心怖風鶴草木盛蕤蕤遂令豺狼
徒漸欲薄王畿余時抗疏上金賜諫臣歸禁網欲踈濶
民生尚嗚噫哀哉余薄祜執執失所依苦塊自寢息風
木空歔歔我友念獨切三載同病痲雙鯉日日寄文綺

有光輝區區賤子心不得遂初衣豈特感君恩兼以慰
所睎春日柳濯濯駕言四牡駢聚首每達旦語語色欲飛
唱和千百篇敝篋盡芳非以此為歲月不復憂讒譏直
欲凌摩詰豈惟陋李頎海內有心人負笈策輕肥願言
見揚子晰義於芒微一麾赴晉臬冤滯察其幾陰德銷
鉗網質成忘是非連月音書來寸心願勿違緬懷元白
交千里夢魂依惠莊喻郢質匠石聽斤揮我友不得見
雨雪漫霏霏遙望太行岑羊腸不可刳庶幾脫簪笏拂

竿共釣磯

可階從趙夢白先生遊數過從謂我似之悲歌泣
下余愧謝無能作此志贈

美人日以遠嘉言日以閑回首涕河干欲洒千行涕我
生甫垂髫猶及見曩制奄忽鬢毛斑光景如隔世翩翩
豪右子衿服多妖麗所寶惟孔方口腹適甘脆不見白
屋人饑寒困塗泥郭君有古風悲歌守窮歲裂背不義
徒云我諳大計庶幾忠毅公孤雲同搖曳嗟余材力薄

清節焉可繼
黽夙夜心坐擁百城勢看劍與檢書北
窻當共憇莫使毛薛公千載空遐契

選唐詩清覽集作

鴻濛啟元運靈淑鍾人紀喜起肇賡歌風雅隆周祀漢
魏有升降六朝多靡綺卓哉貞觀君世濟擅厥美磊磊
富瓊枝寧獨杜與李歷下重格調竟陵采幽旨遙遙
古人心笙竽若隔耳大道已曠邈澆氣顧莫止鎮以中和
音萬物返其始

春日感懷詩

少伯霸越後五湖烟水清子房學辟穀欲從赤松行古
之賢達人脫屣視公卿而我竟何事高卧古燕京寒威
日凜冽三月及清明春風度楊柳百卉始向榮啾啾榆
枋間鳥雀自相爭何如空山下萋萋芳草生桃花蔽夾
岸冷冷澗水鳴念此長太息流涕濡冠纓歸與會有時
遙憶古人情

其二

種樹以為林結茅以成屋家有負郭田聊足供饘粥春
風樹若黛秋雨山如沐二三老農人戴笠牧黃犢此事
樂有餘此生甘鹿鹿虛名剪膏火途窮見車覆憂來每
無方顛毛種種禿座右金人銘朝夕事三復錢鏐真吾
師敬慎以為勲

其三

范丹釜生塵曲逆家落魄張陳與蕭朱衡纘爭強弱所
以朱公叔絕交甘寂寞人生重友朋明信以為約鬱鬱

青松色歲寒終不削愧彼桃李花方春競絢焯余家世
燕趙由來恥浮薄策馬古鄆城遙望邯鄲郭桓桓信陵
君仗義資大畧好與屠沽游孤寒欣有託嘆息斯人去仁
風不可作

其四

猶龍與鳬盟我輩論文早王孟如復生晨夕相傾倒晚
得巢壑子浩歌天地老仗劍走西秦尋源崑崙道不見
古時人唯見連天草長鋏復歸來黃鵠翔蒼昊莫効隨

陽鴈飲啄謀梁稻庶幾共夷猶廣羊山色好

巢壑子嚴岳也雞澤

人

其五

展轉不能寐然燭照空房童僕俱靜默鷄鳴夜未央起
視天宇濶晶晶衆星光招搖尚西指參畢忽已藏憶昨
庚子歲太史占災祥熒惑與長庚凌犯互相傷冬初彗
孛出識者多憂皇豈料春正月鼎湖龍飛翔袞衣不可
見悵望白雲鄉

其六

芒屨沿溪行西至白雲院白雲自去來不見古人面松
陰羽士家晨爨炊香飯曲逕轉幽篁綸巾雜丹篆對此
默無言玉液思修鍊當年長春子萬里走雪山諄諄不
嗜殺沙漠霽龍顏乃知古仙術仍欲濟時艱安得戰伐
息蒼岫閉松關

示勸嘉二子詩

吾年五十餘氣血漸衰老爾等業未成使我縈懷抱長

者頗知書歐李筆法好次者畢論孟未知數文藻老子
復何為日日東華道豈不念鄉閭林園多茂草欣逢日
初昇海內未襁褓歲值丙午春天賜豐年造倉鷄鳴黃
桑麥秀發岐早秋禾遍郊原水田足香稻吾將歸乎來

高歌問瀛島

是歲九月
余果歸里

觀心

周孔扶名教佛老言生死統此一心耳天人紛其指我
常坐高齋兀兀念不起一燈照空帷寂然心欲死心豈

真死哉澄澄備萬理氣化日乘除靈源有終始廣大自
精微先須去其累明月照長空寒夜天如水

癸丑春申鳧盟寄我杜子美像大名道孔心一寄
我杜詩鈔喜而有咏

既獲子美像又得杜詩鈔拜像慰吾心讀詩締石交憶
昔天寶歲安史並咆哮河朔堅城破鋒鏑過函嶠公起
居諫職救瑄謫草茅漂泊至西蜀涕泣落山坳鹽車厄
駉駉涔蹄困龍蛟如何忠義性百死不可拋惜哉不再

用幕府老江郊

殷太師比干墓

商受荒厥緒毒痛遍九土賢聖六七君感慨成今古太
師懷忠烈殺身對宗祖世運幾千年巍我崇廟庶不馨
周俎豆獨沐殷風雨我聞尼父筆龍圖豁羣瞽倘聽諫
輔言八百豈敢侮空明七竅心不悟淫酗主碧血化白
虹鷹揚已耀武馬鬣比華崧箕尾照淇許既仁亦且聖
憑弔過南浦

悟莫疑

人生患不悟既悟苦猶疑好聲莫好色好色死之機好
酒莫好利好利禍之資作詩頗自適切忌在傷時著書
亦可樂無識莫強為古來聞達士勞苦瘁四肢策足據
要津履險無坦夷所得僅毫末所失萬有奇不見邯鄲
道黃梁一夢癡華亭與上蔡失足更可悲功名留竹帛
如鳥過目而寄語青雲人一失莫可追

張貞女詩

事在明季萬厯時因覽志而咏之

既仕而殉難此乃士之常既嫁而殉節此乃婦之常偉哉張貞女晰義於毫芒一言諧秦晉生死為楊郎何必車百兩何必縑千箱何必合卺爵何必共笙簧矢志在同穴盟言不可忘聞訃痛欲絕對媼洗紅粧相從于地下形化骨猶香祖媼再勸慰爾何太匆忙生亦可守節何必遽殞亡女言若不死許我往奔喪否則必決絕勿用徒憂傷媼與伊父謀是女性德剛不如且從之徐與議權量女乃至墓側衰服哭悽愴哀感動路人天地為

激昂以手抉其墓遂欲共幽藏祖媼垂涕泗爾死我亦
戕女言依我語易髻拜姑嫜娣姒及僣從私語共徬徨
自古豈有此無乃罹于殃女言我意定廟見歸其房入
厨作羹飧上堂供稻粱揚呼為冢婦嘆息此姬姜居諸
倏數月蟲語變蛩螢祖媼從容語大義亦允臧宜圖永
上語鸞鳳共翱翔華鈿耀寶釧明珠綴兩璫流蘇垂錦
繡交頸許鴛鴦車馬如流水兒女必成行女言此何語
人生亦有良百年瞬息耳終歸於北邙幼讀列女傳仰

止如堂皇耿耿鐵石心寸寸斷柔腸隨俗雖可悅豈不負
義方毀容碎珍衣漸至減水漿絕粒以待斃附葬藁砧
傍作傳者李子叙次頗贍詳余幼聞此事愧乏瓊瑰章
茲讀南亭志辦香為表揚古之貞女多如此實難當士
而若此者古惟有首陽西山采薇食千古共頡頏寄語
衿悅人彤管有芬芳

古風

農家有真樂歸田始得知一犁耕初雨五月織新絲塙

頭梨棗熟鳥雀莫令窺園內蔬菜長灌溉不失期秋成
但得半豈復愁朝饑雖曰官租急幸免戍邊睡晚黍況
已茂新釀日可期入門喚婦子客至速為炊

范子名德基字元生屋武安竹昌林中

漢有臺孝威隱於武安山采藥以自給鑿穴巉巖間州
郡辟不就日聽水潺潺存神養性命外物不能奸茲事
載史冊高風邈難攀范子通大道陰陽自循環捐棄名
與利竭來共我閒夜深相對語青燈照心顏參同與悟

真其中有可刪何以相勗勉林下閉松關

七言古

踏青行

野外尋春春未去踏青偏向桃花處三株五株發村邊
梨花杏花花相助便令童子呼濁醪仰天大笑且蹲踞
追憶當年掌絲綸百年機務勞思慮一從予告在田間
觸熱衝寒皆不預豈無傾葵向日心自有羲和執日御
漢家天下已太平才非留侯奚借箸冥然一醉玉山頽

雲橫谷口青溪曙

白子行送友人白方玉同州幕作也

白子白子將西征一劍蒯緱何飄零翩翩記室豈所願
暫曳珠履說公卿憶昔文場曾酣戰奎光直射天香殿
主司頭腦大冬烘過眼誰知五色變邇來託志在柴桑
高歌獨怡甕牖光就余鄴架檢縹緗酹一枕到羲皇
區區槐城大如斗素心知己復何有短衣匹馬去蕭然
秋原落葉幾回首嗟乎哉古人豪貴成丘塋今人鬻市

鐵冶何足憑權門
嚙省不下士誰是
原嘗與春陵西去
同州隣華嶽雙手
好將白雲捉大呼
希夷陳先生芙蓉
片片待余蹕

汪雲礎過訪惠六安茶

十年探藻縹緗庫
射策彤廷稱獨步
種就河陽一縣花
五斗忽念折腰誤
俠氣翩翩藐二豪
一官輕視等鴻毛
掉頭東去廬江側
拍浮酒船持蟹螯
邇來壯志悲拓落
暫典荷衣別猿鶴
一劍孤懸走栢人
叩門傾倒開寂寞

寄我新茗汲水烹乳花浮面嗅清英高譚四座珠璣錯
暑炎全消涼颼生君不見古人縱橫有舌在為虎為鼠
多變改明朝馬首向燕臺人言公才大如海

題平子遠母馮氏節孝

黃鵠歌聲夜未央燕山越水道路長癭陶佐治淳且良
以德化民比仇香清風兩袖惟空囊三女一子泣他鄉
夢魂飄緲度關梁泪流洒血染衣裳數卷蠹魚遺青箱
孤兒成立不復僵春日零露秋嚴霜屢試不第歸路忙

卞和哭玉荆山陽六走長安乞詩章掃門曳裾上華堂
自咏新什聲琅琅彙粹風雅滿縹緗如金石兮如琳瑯
我續列女闡幽光得此配之祀羶腳賢母孝子家世昌

祝撫院金公壽詩

辛亥十月初七日

山嵯峨水洋洋產生偉人氣昂藏少年腹笥飽縹緗司
馬家風比琳瑯芰荷為衣芙蓉裳二十早登玉尺堂尚
書粉署舌含香清通簡要不尋常三銓頌美度汪洋盡
收驛騶與飛黃海上風烟颺起狂樓船南下旌旆揚

天子旰食念水鄉特簡精忠招陸梁知公大才濟川航
帛勅宣揚德意長襁褓東海盡遐荒約束循履如驅羊
當宁奏對現禎祥嘉公懋績在風檣銀臺晉秩錄封章
憲臺正色効贊襄遂開大府莅恒陽燕趙宣雲惠澤颺
衽席萬民皆殷昌水衝沙壓田瘠荒抗疏論列為除將
時際亢暘作災殃視民如傷痛中腸請蠲請賑不遺忘
桑麻千里無流亡清操不染食玉漿勞謙君子誌循牆
百城凜凜若懷霜十部從事札十行十月小春鴈南翔

鈴閣高處金琅璫公方振衣千仞岡青鳥來傳鼓銀簧
瑤池綵衣雙鳳凰我公額生百寶光不須龍宮寫禁方
直心已入選佛場為公高舉九霞觴

訪故人不遇留題

憶昔數年之前曾此遊高歌痛飲恣傾倒倜儻不羣者
誰與子之意氣如雲凌蒼昊幾歲寄我空中書藏君隻
字比瑤草長安市上再相逢握手為歡抒懷抱造化困
我久支離伏枕驚詫春光老起來策杖任聽之兀兀欵

段東華道門對高城陰樾幽西望青山黛色早一丘一
壑饒奇姿竹樹交翳橫荇藻剝啄柴門三徑開稚子烹
葵薦梨棗倒床黑甜午夢齁栩栩真覺華胥好腹中有
話空咽回墨瀋淋漓已成稿寄語司閤他日來堦石莫
惜為我掃

七歌

甲午年作

嗟余弱冠未知名趼足十載走荒城途窮反遭俗眼白
披裘帶索笑零丁上書一朝見天子夜半前席在承明

金盤薦食何足美通經稽古有餘榮嗚呼一歌兮歌初
放眼光直出牛背上

二

生年忽已三十九我父見背在己丑寒雲滿空雪滿山
但望松楸如疾首遺書滿簾不能讀直筆欲繼班馬後
先子著有明書未竟平野堂前十畝園松竹當年手自培嗚呼二

歌兮歌思哀悲風颭颭從天來

平野堂在柳庄

三

母之祖考出於張有明正人官職方撫我鞠我多聖善
歎歲冒甘啖牼糠教兒讀書婦紡織篝燈不知寒夜長
兩兒今已衣朱襮負米何由上高堂嗚呼三歌兮歌聲
咽蟲聲滿壁愁如結

正人張職方載趙忠毅公文集孫北海畿輔人物志

四

有兄有兄大江西

兄時作令建昌

折腰作吏亦何為彭澤浪翻

蛟龍怒匡廬翠律連九疑白鹿春雲搖古樹扁舟何處
問幽奇雙魚欲寄無黃犬三年不見空相思嗚呼四歌

兮仰天喟中夜徬徨不可寐

五

有姊有姊嫁瘿陶中年無病忽催凋光風轉蕙崇蘭謝
幽室一閉不復朝爾獨何為不相待使余慈母音噉噉
從爾地下爾知否諸孤遺恨泣清宵嗚呼五歌兮歌未
歇甥其思之慎勿忽

母以哭姊卒

六

有妹有妹志獨立良人蚤沒獨掩泣生兒命苦無父師

一經喃喃手自執夜半時聞黃鵠歌共姜守義幼所習
三冬紡績供舅姑寒飈飛雪空房急嗚呼六歌兮長太
息白日淒淒澹無色

七

有弟有弟志不下倣儻權竒擬天馬饑寒不救妻子啼
高文落紙多魚雅十年困頓未逢時薦福千本碑空打
高秋爽氣合奮飛一朝冠蓋傾洛社嗚呼七歌兮歌欲
停念爾高齋對翠屏

桃源行有序

昔晉有高士陶淵明置身三代嘆其身遭劉宋
禪代之際世之人莫已知也故作桃花源記綴
之詩以自明其古處其文云此中人語云不足
為外人道也嗚呼非此中人足道乎又云劉子
驥親往未果後遂無問津者嗚呼非其人津可
問乎乃唐人如王摩詰劉夢得韓退之等皆以
桃源為神仙而東坡亦不能辨以為漁人所見
乃避秦者之子孫是皆無異於說夢也余嘗熟
讀陶集偶有所見擬作數句雖詞
意膚淺庶幾窺於作者之意云爾

淵明自謂羲皇人作為詩記擬避秦秦人宋人一而已
詐力篡殺不足詢柴桑自有桃源渡洞口雲深落英聚

鷄犬尚有古音聲衣裳不作新制度此中避世可千年
春花秋月自娟娟峽中不知人何事世人遙望惟青山
山色溪光終不改武陵白雲自相待却笑時人欲問津
避秦之宅竟安在

雲龍吟

思猶龍學士作也

昔有退之與東野欲為雲龍相追逐抒其不平之鳴吾
友又見猶龍氏肝膽無猜共此生奈何落羽復分飛驚
心雷雨之砰訇西出井陘塞南走城臯道汾水悠悠無

盡時黃河東下連滄島安得與子徘徊鉅鹿下讀史遷
奇文之浩浩不然憂能傷人使我鬚髮皓白如雪而將
老

賦得夏雲多奇峰

五月六月雨時作奇雲蔚跂紛錯落倏見莽泱抱日流
旋與回風相磅礴亭亭一柱峙太空混茫元氣通寥廓
森森岩岫列千層明霞碧澗耀丹艸天台鴈宕何足多
五岳真容起空漠世人見雲不見峰豈知峰即為雲橐

峯雲變化無窮時造物神力誰厚薄憶昔曾懷向平心
青鞋布襪冠竹簪婚嫁未畢禽慶往誰能支策凌飛鶴
以茲感嘆望雲峰醉眼常存古丘壑

秋夜行

寒風一夜悲騷屑萬木蕭疎晚秋節白雲在天鬱不流
梧桐半死芙蓉折盡堂張宴鼓青絲霓裳六么相間之
美人二八顏如玉目成心許恨別離悵別離兮可奈何我
今作歌為君歌

辛丑初夏觀蔡子虛年兄郎署就閒詩賦贈

大雅廢墮三十祀夢白之後謫仙死鄭衛雜奏盡淫哇
吹以候笙若隔耳君才卓犖本不羣十年讀書汶水濱
句句驚人飛鳴勢俯視卮言若蠛蚊昨日遺我詩一帙
展卷光氣已氤氲薔薇盤手然後讀讀之爽氣凌高雲
點檢生平發深省惻惻遺氓望引領古風直逼元道州
流涕欲叫閭闔迥春來萬事等塵埃春圃春花爛熳開
美君獨具有詩才富貴於君何有哉

邯鄲少年行

用高達夫韻

邯鄲少年良家子，輕裘肥馬平千里。
拒守朱仙曾突陣，大戰凌河身未死。
時移事去何紛紛，易水燕山大蠹負。
米何曾逢李白有策不得獻，吾君君不見今日交情薄。
五侯七貴自相索，以茲抱犢西山遊。
欲將仙人，大藥求夢

回明月，寒燈夜猶憶射雉三十頭。

崇禎末年流寇與左良玉戰朱仙鎮別分

兵圍大凌河

申子鳧盟永年人學道工詩余之好友也別後或

數年而一遇或一年而一遇遇則必相傾倒今
歲春杪至都談深浮白醉後竟不自知踏月而
去端陽後復欲歸里余既久宦倦翼思還則望
申子結廬於洺水之側以俯仰二儀錯綜人物
凌霄漢而出宇宙勿使禽尚笑人於千載之上
耳於其行也作此贈之

數年不見心若失一年不見心轉迷春消夏長子來思
夜飲香醪醉不知平頭奴子歌吳曲百轉流鶯耳半凝

子才超蹕如騷衷不上春官愛紅蓼依人羞登玉粲樓
訪友常理山陰棹好奇兄弟似岑參閉戶讀書千百函
每至孫登長嘯處笑指堯夫舊草菴余也仕宦風塵久
潦倒天涯將白首今世知我有涵三又有伯巖稱黃耆
與子落落成三人不分廊廟及畎畝興酣搖筆驚鬼神
愁來白眼拋敝帚學宗滄海祖岱嶽孰問行潦並培塿
子今歸去洛水東烹煉丹砂慕葛洪扶持元氣灝虛空
三十六帝外臣同臨別何必灑淚紅待余青鞋布襪枕

石漱流彈琴而咏先生之風

寄謝諫垣諸君子

丙午九月歸里作

衣一箱書一駝行李西渡桑乾河桑乾之水水揚波諫
議大夫十二人設筵張席離國門離國門一何遠執手
叮嚀歸莫晚主聖臣賢千載期房杜魏宋是良師感君
情念君厚鶴怨猿啼雖可憐金門好友應難負唱驪駒
重進酒日暮西風幾回首古來賢達皆相知誰繪丹青
傳不朽

中和殿大學士兼冢宰金老先生家藏畫鷹宋徽宗的筆也閒中命余題之余自愧弁鄙聊為七言古風以咏並請教正

氣應少皞爽鳩氏勁翮森竦勢欲起人言此是海東青
飛過碣石三千里三千里外集橫木虞人巧計相羈服
一朝獻入長楊宮日食大官庖下肉革絆金鑲逸氣生
爪如銀鈎足枯荆尾疏臆濶日常側雄心慘澹若經營
伏盡秋高商飈發翠華雷電動雲闕獵師相將始出籠

礪吻下韞色若艸草枯木落孤兔驕凌霄一縱搏飄颻
須臾洒血滿平地龍媒照夜競鳴鑣功成歸來振毛羽
恥與燕雀同儔伍畫壁猶令凡鳥驚丹青仍貯雲臺府
君不見祝融之精為鳳凰五德俱備羽虫王千年一見
煥文章驚鳥自古比忠臣周之尚父稱鷹揚閔天散宜
旦爽同翱翔

贈彭子士報

長安擾擾人如傀誰識塵埃有彼美酒甘如醴為君傾

耳熱風生悲歌起悲莫悲兮人壽之不可期樂莫樂兮
吾心之可自喜談詩說劍颼颼而驚人夢魂飄渺烟蘿
裏扁舟一葉下邗溝北固山前弔江水六朝衰柳尚淒
迷寒鴉飛盡宮牆圯歌舞粉黛何足多可惜古之才人
今已死今已死塚累累花鈿寶釧媚室人輕裘駿馬驕
閭里有錢自入衛霍門誰肯解衣衣寒士買犢歸種梁
苑田把竿還釣睢陽許勸我休從赤松遊且留黃閣蘇
瘡痛感君盛意欲徘徊成功者退天之理策蹇秋風大

陸澤澆花淪茗待吾子

魚濟堂文集卷十八